

要。雖急切之辦法。然以言根本之計。似亦不外是矣。夫以今日之事。楚歌四面。幾於防不勝防。然窺中朝之命意。則其處置西南。似較西北尤爲忽略。一旦有事。不知何以禦之。而今者他人之意。又已顯露。有識之士。所不得不爲寒心者也。記者所陳數端。似尙非甚難而不易舉。誠能及此。綢繆其事。則人之要求於我者。或天所以牖當路之衷乎。

湖南巡撫端奏湘省援桂一軍迭獲渠魁卓著勦績並邊防安謐情形摺

竊查湘省防務自上年派軍援桂相機進剿迭得勝仗並將西南兩路增兵置防各情經前署撫臣陸元鼎先後奏報在案奴才到任後正值援桂統領忠字全旗署江南狼山鎮總兵黃忠浩一軍剿辦得手之際又經奴才馳電慰勞節據該總兵報稱帶隊親至融縣羅城一帶搜捕餘匪於四堡地方獲匪首梁日忠及叛弁覃元章梁福源等並用火攻燒斃巨匪梁萬順卽梁濫六實爲匪中渠魁前後共獲首要四十餘名擊斃三十餘名窮蹙出降者亦三十餘名又於三防地方拿獲積匪劉子洪章昌傑等二十五名山峒匪搜取無遺並令匪徒繳呈槍械許其投誠所得槍械逼碼甚多融縣懷遠等屬遊匪已盡可冀肅清該軍自上年五月赴援艱苦備嘗感受瘴癘病亡相踵而桂省客軍則以該軍爲冠岑春煊亟稱其士氣奮勵是以立功甚多此援桂一軍搜捕餘匪漸次肅清之實在情形也至於湘省邊防則

自黔邊竄匪剿禦得宜之後西路安堵如常現據辰沅永靖道莊慶良稟稱黔邊業已靖謐正擬將前次調往防堵各軍分別調回並酌留數百人扼要駐紮以資應援南路則張慶雲一軍遵旨仍紮全州並經奏明飭令兼統江南常備右軍而以杜俞爲幫統督帶中營該軍換統之時經奴才遴委前廣西候補道沈世培前往該軍體察情形妥商布置茲據該員與張慶雲等會商擬定辦法又經奴才電商湖廣總督臣張之洞署兩江總督臣周馥斟酌核定意見相同飭令照辦因南路以永明縣之龍虎關桃川墟江華縣之白芒營葫蘆口最爲險隘現祇健字旗兩哨分駐實形單薄而永州府城則有常備軍四營並健字第七旗兵力又嫌稍厚卽常備軍酌留兩營駐防永州抽出兩營分駐龍虎關桃川墟白芒營葫蘆口等處扼要駐紮歸杜俞駐永督率嚴堵粵匪由平樂一帶竄湘之路其健字旗原駐兩哨卽行調回本旗並將健字第七旗調回與第二旗同紮黃沙河歸張慶雲駐全督率以當粵匪由桂林全州竄湘之路各專責成互相策應張慶雲身爲兼統並令兼顧兩路勤加會哨徐圖整頓以成勁旅現在將領輯和軍心亦稱安戢至劉光才一軍則仍分駐城步新甯等處俾爲聲援嗣後桂匪漸清當不虞其竄擾足以仰慰宸厪仍由奴才分飭防剿各軍不得以匪事甫有端倪稍萌疏懈其餘未盡各事隨時再與黔桂各督撫臣會商妥辦統計湘省

此次籌辦邊防援桂援黔士卒均能異常出力一年之中迭著成效其平時守禦各軍亦復殫心竭慮使地方得以相安皆有成勞可紀一俟桂省軍事畧定應懇 天恩容奴才將在事出力各員弁奏請獎敘以昭激勸謹 奏奉 硃批著擇尤分別酌保毋許冒濫欽此

新疆巡撫潘奏設立卡倫查禁逃哈摺

竊臣承准軍機大臣字寄光緒二十九年五月初四日奉 上諭長庚等奏議還借地一摺據稱阿爾泰山地段周圍七百餘里從前借哈塔城之案糾葛多年現經將軍秉公勸議將原借地段交還科布多參贊大臣管轄其潛往之哈民人等隨地歸住科布多境者歸科城管轄住塔爾巴哈臺境者歸塔城管轄等語應如所請辦理卽著瑞洵春滿迅卽定期交收妥爲安插約束和衷會商悉心經理其潛入新疆南北路之哈民著潘效蘇趕緊設卡查禁並另派員會同科塔兩城派來之員分別收回各歸各牧以免紛擾餘依議等因欽此查科塔兩城哈薩克潛來新疆地面游牧歷年已久因非新疆管轄搶竊頻仍肆無忌憚爲害閭閻此次奉 旨收回原牧除南路塔爾巴哈臺屬屈莽山尙有頭目布克一股二百餘人因抗拒兵團業經 奏請派撥兵隊前往相機迅拿另案辦理外其餘北路之鎮西奇臺孚遠阜康迪化昌吉呼圖壁綏來庫康喀喇烏蘇精阿南路之焉耆吐魯番鄯善各屬逃哈經地方文